

## Péterù andí ɔɔ rí kisé nǐ bhàrɔwà Yàrí bhàrɔwà ò ì nòtù ádròdrǒ dhu tí dhu

Yàrí bhàrɔwà nandí ní Simoni Péterù, Yěsù Krístò bhà kasutále ndirò kàbhà uvitatále (1.1). Kǎndí ka azà kumì dòná imbò nà ato mà azà kumì dòná àrùgyètdí nà ato mà nà nzínzì ǒ Yěsù ka kùgù dhu-dzidǒ.

Péterù andí ndi ɔɔ rí kisé pbìndà bhàrɔwà kóró pbàkrístò tò, ndínǐ abádhí irè tí yà fíyò ndi ndúdhe dhu (1.12).

Kázè dhu ní abádhí rùgye ì tìtò tó màlímó mà nà abádhí tó nzére mètso mà nà (2.1-22).

### **Bhàrɔwà-nyìtì ka kòhù tí dhu**

- Bhàrɔwà-dòkpa (1.1-2).
- Kàgàwà rǐ indrǔ ùnzi dhu mà i ale àkǎ ò'ò a'uta ǒ dhu mà nà dhu (1.3-15).
- Kàgàwà bhà Ɔte rǒ dhu àkǎ kapbǎ ale-afí dhu (1.16-21).
- Inzá dhu àkǎ kirì tìtò tó màlímó rǔdhena dhu (2.1-22).
- Ingo Ádrùngbǎle Yěsù níngoya dhu (3.1-18).

### *Péterù rǐ indrǔ nóvì dhu*

<sup>1</sup> Yàrí bhàrɔwà nandí fǔkù ní ima Simiyoni Péterù. Ima ní Yěsù Krístò bhà kasutále, ndirò ima ní kàbhà uvitatále. Nyǐ nyá'ù Yěsù Krístò àdhàdhì mà má'ù ka átò dhu bhěyi. Ndi a'uta rǐ'ì ábhǒ ídzìnga nyú nà fǔkù, àdhàdhì kà rǐ'ì

ábhò ídzìnga nà fǎkà átò dhu bhěyi. Yěsù Krístò ábhù àě rǐ'ì ndì a'uta nà, obhónángatále tí ndì ndí'ì dhu-okú dò rò. Àbadhi ní Kàgàwà ndìrò ka ní àě tó Ɔgùba. <sup>2</sup> Ní, Kàgàwà àkǎ ndàso nyǐ ndàdù nyǎbhù nyòkò mǎrùngà ǒ atdíđ, ndì mǎ, àě tó Ádrùngbǎle Yěsù Krístò mǎnà nyǐ nyúni atdíđ dhu-otù ǒ.

*Kàgàwà rǐ indrǔ ùnzi dhu mǎ a'uta ǒ dhu àkǎ kǒ'ò dhu mǎnà dhu*  
(Yùw 17.2-3; 2Tì 3.16; Tit 2.11-14; Fìl 1.9-11; 3.8-14; Èbr 6.11-12; 1Pé 1.10-12)

<sup>3</sup> Kàgàwà tó pbìndà ádrùngbǎnga tó obi nǐ, Ádrùngbǎle Yěsù íbhò kóró dhu-tsí yà àě kí atdyúya òho àě tò, ndíní àě koko tí Kàgàwà-rò àě kàpbǎ àě-afí rórò. Obhó tí, kǎbhù àě'ì àě rùni ndì Kàgàwà, yà àě nunzi ndíní àě kabá tí pbìndà ádrùngbǎnga tó awáwù mǎ pbìndà ídzìnga mǎnà ale. <sup>4</sup> Ndi dhu bhěyi ní ndì, Kàgàwà íbhò yà ndì ndakò fìndá làkà ɔrú odziya nà ádròdrǒ dhu àě tò. Ndi làkà nyǐ nyábà nídhunǐ, nyǐ nyí'ì inè nyòtsè yà adzi ǒ nzéɛ dhu-atdyú òho nyǐ nyí dhu-tsǔ rò, nyǎdù yà Kàgàwà bhà ale tí rí nyǐtè ófò nódyì. <sup>5</sup> Ní ndì dhu-okú dò rò, nyǐ nyàkǎ nyǒnzì obi nyǐsě fùkú a'uta dǒ dhu ní ídzìnga t'ónzita. Ídzìnga t'ónzita dǒ, nyǐ nyàkǎ nyǐsě dhu ní Kàgàwà ùnǐ nyǐ nyí mběyi nyú dhu. <sup>6</sup> Kàgàwà ùnǐ nyǐ nyí mběyi nyú dhu dǒ, nyǐ nyàkǎ nyǐsě dhu ní ìnzǐ nyǐ nyí nyǐtsǔ akye atdí dhu ò dhu. Ìnzǐ nyǐ nyí nyǐtsǔ akye atdí dhu ò dhu dǒ, nyǐ nyàkǎ nyǐsě dhu ní dhu-dzi t'óndùta. Dhu-dzi t'óndùta dǒ nyǐ nyàkǎ nyǐsě

ní Kàgàwà ózè dhu ònzi nyí nyí dhu. <sup>7</sup> Kàgàwà ózè dhu ònzi nyí nyí dhu dǒ nyí nyàkǎ nyísè dhu ní atdí àba bhà ale bhěyi nyí nyí nyòzè dhu. Ndirò, atdí àba bhà ale bhěyi nyí nyí nyòzè dhu dǒ, nyí nyàkǎ nyísè dhu ní kóró ale òzè nyí nyí dhu. <sup>8</sup> Obhó tí, nyí nyapé ì'ì kòrí mùtso nà abho nyú, ní nyí nyónzina kasu rǎdù ábhò itse nyú nódhì, nyǎdù àmbe àlě tó Ádrùngbǎle Yèsù Krístò núnì dǒ mběyi nyú. <sup>9</sup> Pbétù, ìmbǎ arí'ì kǒkò mùtso-tidò nà ale ní ndùmùndúmú, yà ìnzì rǎdù inga àla ale. Ndi ale ònǎ rò, iwà ndì ndú'ò ndì ndilǎ yà angyi ì'ì pbìndà nzérenga ǒ rò dhu nádzo wà. <sup>10</sup> Ní ndi dhu-okú dò rò àbanǎnzó, àdhàdhì yà Kàgàwà óvò nyí, ndàdù nyúnzi dhu bhěyi, nyí nyàkǎ nyónzì obi atdídǒ ndíní nyí nyoko tí àkǎkǎ ale tí wò ndi otu ǒ. Nyí nyapé kòrí dhu ònzi, ní nyí nyí nzì àdù nyǎwà akekpá màtí nzére dhu ò. <sup>11</sup> Obhó tí, ndi dhu bhěyi nyí nyónzì dhu rò ní ndi nyí nyádù rusà àbà atdídǒ, nyòtsù nǎ àlě tó Ádrùngbǎle, ǒgùba Yèsù Krístò bhà dhòdhóhóngà tó Idzi ò.

<sup>12</sup> Wò dhu-okú dò rò ní ndi, ma mádi mongò àmbe ì dhu isè dǒ fùkù bìlǐnganà, iwà màtí nyí nyúnì ì dhu, nyǎdù ìko pòtsó yà nyí nyábà obhóngà ǒ rórò. <sup>13</sup> Ní, ma màla dhu mběyi nyú marà fùkù ìrèta nángbe rǒ, misè ì dhu fùkù yà àdì ma màdì nyìkpódu nà ònǎ kàsùmì ǒ. <sup>14</sup> Obhó tí, ma múnì wà dhu, ma mǒvè ònǎ idho rìndù wà ndì, àdhàdhì àlě tó Ádrùngbǎle Yèsù Krístò itè ka k pangba idù dhu bhěyi. <sup>15</sup> Ní, ma mí obi ònzi atdídǒ mìtè nyí nyóngo ì dhu ìrè bìlǐnganà

iwà ma mǒvè rǒrò màtí òná otu fǔkù.

*Kàgàwà bhà Ɔte rǒ dhu àkǎ kapbǎ ale-afí dhu*

<sup>16</sup> Obhó tí, yà mǎ mǒvò àlě tó Ádrùngbǎle Yěsù Krístò iraya ádrùngbǎnga tó ɔbi nà dhu tó màkǔrù fǔkù rò, mǎ mǒvò nzá ka yà ìndrǔ ìtsǒ tìtò tó imbe ǒ. Pbétù, mǎ mála wà kàbhà ádrùngbǎnga tó ɔbi nyìkpóka nyú nǐ. <sup>17</sup> Obhó tí, kǎbà ifuta mà, ádrùngbǎnga tó awáwù mànà Àbanà Kàgàwà-fó, yà ndi ádrùngbǎnga tó ɔbi nà arí'ì Kàgàwà-tù níri ndi nínganí. Ndi ale-tù ati: «Yàrí ní Idhùdu, atdíđǒ ma mózè ale. Kǎrí nyìkpódu nòfò dhu ònzi\*.» <sup>18</sup> Mǎ'i nyú mǎ-tírò, mǎ miri wòrí ale-tù òrù-akpà ò rò rírà ró, yà atdíkpá mǎ mi'ì kà mànà ìlǐlǎ pbirì đǒ rò.

<sup>19</sup> Ndirò, mǎ má'ù wà yà pbànábí núuno angyangyi ɔte atdíđǒ. Ní nyǐ, nyǐ nyónzì dhu mběyi nyǎpbǎ afíku ndi ɔte rǒ. Wò ndi abádhí avò dhu rǐ'ì àdhàdhì tarà bhěyi, yà ìnò ǒ rádù inga àwù, ràrà àhù inga rǔbho dhu ò, rádù àrà àhù kútsingá nga tó alalí† rǐ afíku-ònga àtdye òná kàsùmì ò. <sup>20</sup> Nyǐ nyàkǎ nyǔni angyi kóró dhu tò dhu ní, pbànábí avò ìndrǔ tò angyangyi ìlǐlǎ Anditá ò rǐ'ì dhu, ní abádhí ravò nzá ràhù òya ò rò ìtírò. <sup>21</sup> Obhó tí, i pbànábí avò ìndrǔ tò dhu náahè nzá ìndrǔ ò rò. Pbétù, Kàgàwà bhà ìlǐlǎ Alafí ní ndi abádhí àbhù ongónà ròvò Kàgàwà ìtè fíyò dhu ìndrǔ tò.

---

\* **1:17** 1.17 Ìsa 42.1; Mát 17.5; Mrk 9.7; Luk 9.35 † **1:19** 1.19 Ɔzt 24.17; Luk 1.78; Upf 2.18; 22.16

## 2

*Inzá dhu àkǎ kirì tìtò tó màlímó rǔdhenà dhu dhu*

*(Kas 20.29-30; 2Tì 3.1-9; Yud 3-16; Upf 2.14,15)*

<sup>1</sup> Angyí, tìtò tó pbànábí núnyà ì Pbàìsràyélí nzínzì ǒ. Ní ndì dhu bhěyi tí, tìtò tó màlímó núnyàya ì ùnyà nzínzikù ǒ átò. I ale níitsuya tìtò tó nzére dhu t'údheta-tidò nà nzínzikù ǒ inzà nyí nyùni rórò, 'àdù yà ì nùwù Àdrùngbàle Yěsù nyú mà nódhò. Ndi dhu bhěyi ní ndì, abádhí níidhaya Kàgàwà rǐ tsěya ǒtdì kòmbómbí dhu ìtírò dòyà. <sup>2</sup> Ábhǒ ale núunguya abádhí-owù fiyó nzére mǔtsò ǒ. Ndirò abádhí-okú dò rò, ka kowuya dhu ùnò rǒ nzére Kàgàwà bhà obhóná otu nǐ. <sup>3</sup> Ndirò, atdíǒ ì í ongyéngá-atdyú nóho 'àbà dhu-okú dò rò, abádhí nóowuya nyǔtra rǒ ìtsǒ ì ìtsǒ tìtò tó ǒte nǐ. Pbétù ròpè ndì màhàngú ò rò, Kàgàwà rǐ abádhí-ànyǎ ìtdì, ndàdù abádhí-tsè ǒtdì ònà idhò rǐ ì ìkyèrǒ.

<sup>4</sup> Obhó tí, Kàgàwà náabà nzá izu kǎkà nzérenga nanzì màlàyíká dǒ màtí\*. Pbétù, kǎwà abádhí ìnzì aráve dhòdhódhóngà nà kàzu ò. Kǎrì abádhí òdò atdíǒ ùtì mbii ìnǒ-yà-ba ǒ, iwà ka kusó àdrà-mbǐ dǒ rórò, ròngò àmbe ànyàya ìtdì ndì ndaraya ònà idhò òdò dǒ. <sup>5</sup> Kàgàwà náabà nzá izu yà angyinǎ rò nzérenga nanzì yà adzi ǒ ale dǒ màtí átò. Pbétù, yà ndì ndàbhu idha ròtù, ràwìlì nzére ale tó yàrí adzi ònà kàsùmì ǒ, kǎdò Nùwà mà ngbò àrùbhù ngùkpà ale mànà. Ndi Nùwà nǐ ì yà obhónánga tó Ídzì Màkǔrù

\* 2:4 2.4 ǒpt 6.1-2; Yud 6

nunónà ale\*. 6 Ndirò Kàgàwà náatdì Sòdomò mà Gòmòrà nà tó kigò ǒ ale-ànyǎ, ndòtdì tsèya kàzụ nǐ\*. Kǎnzì ndì dhu ndínǐ í'í tǐ atdí ǒfò tǐ kóró ale yà adzi ǒ arí nzérengà ònzi tò. 7 Pbétù kǐgú obhónángatále, Lotì, yà atdíǒ akó kǒkò nzére ale tó nzére mètso-okú dò rò ale. 8 Obhó tǐ, wò ndì obhónángatále nóongónà àdì ì nzére ale nzínzì ǒ, ndàmbe abádhí rǒnzina nzére dhu àndà dǒ, ndàdù àmbe abádhí rùnona nzére dhu ìrì dǒ bilínganà. Ní ndì dhu ongónà àdù kà-afí ìnza atdíǒ. 9 Ní wò dhu rǐtèna dhu ní, Ádrùngbǎle Kàgàwà rǎrǐ'ì inè ndìgǔ yà ndì ndóze dhu ònzi arí ale umvútá ǒ rò. Pbétù, kà rǐ'ì inè ndòdò nzére dhu ònzi arí ale, ndínǐ ndì ndabhùya tǐ ràbà àpbè yà adzi ǒ ale-ànyǎ ìtdì ndì ndí òná idho ǒ. 10 Ndirò, kǐtdìya ànyǎya atdíǒ ròsè ale ní kǎkà ngbǒya rǐ atdyúya òho nzére dhu ǒ tǐ aróko, 'àdù àmbe Kàgàwà bhà ádrùngbǎnga gàyà ònzi dǒ ale.

Kǒkò ì tìtò tó màlímó ní 'ìdzǐ arí ìtírò ale, 'òyò arí ale, ndirò ìnzǐ arí odo ònzi ádrùngbǎnga tó awáwù nà arí'ì òrù-akpà ǒ ìpìrǒngà nà dhu-tsí nǐ ì í dhu ùno nzére rò ale. 11 Yà abádhí nyú núdà obi nǐ, 'àdù ì'ì ádrùngbǎnga tó obi nà màlàyíkà mà náarí nzǐ abádhí òbhu, 'àmbe dhu ùnò dǒ nǐ nzére Ádrùngbǎle-ònzǐ. 12 Ì tìtò tó màlímó arí dhu ònzi àdhàdhì ìrì ǒ ìzǎ arí dhu ònzi ìmbǎ ìrètá na dhu bhèyi, 'àmbe dhu ùnò dǒ ìnzá ì ùnì dhu nǐ màtí. Ìrì ǒ ìzǎ núpè ka karí ràtsi àzèmbè ì álàna àdà ò, kadù òkyènà. Ní ndì dhu bhèyi tǐ, ì tìtò tó màlímó-tsè nóotdíya ndì tsèkè

\* 2:5 2.5 Opt 6.1-7.24 \* 2:6 2.6 Opt 19.24-29

fiyó nzérenga nyú-okú dò rò i irí ǒ ìzǎ bhěyi.  
 13 Kàgàwà abhùya abádhí ràbà àpbè àdhàdhì  
 abádhí arí ngùkpà ale àbhù ràbà àpbè foyá dhu  
 bhěyi. Abádhí-idhè náarí ndìkǎ ìkǎ tí yà ngbǒya  
 ònǎ rò ì í atdyúna òho nzére dhu ònzi ì í adyi-  
 panga rò. Mùhendù ǒ nyí nyí'ì atdíkpá abádhí  
 mànà rò, abádhí-idhè arí ndìkǎ ìkǎ tí nyǔtrǎ ì  
 í rò. Ní mùhendù ǒ abádhí rǐ'ì dhu náarádù  
 ìnze ìnzé tí rùkù, ndi dhu ràdù nyìkù àbhù rìwù.  
 14 Abádhí-nyìkpó arónena ale ní m̀nyòni ònzi ì  
 í nà vèbhále kèlě, ndirò abádhí náarí nzí 'ìngyě  
 nzérenga t'ónzita nǐ. Abádhí náarí kǎkà iviví  
 a'uta nà ale nídha ròtsù nzérenga t'ónzita ò.  
 Abádhí àbhù ongyéngá òne ì í dhu ràtdù afiya  
 atdíǒ. I ale ní iwà Kàgàwà ófù ale! 15 Abádhí  
 úbhà obhóngà tó otu, 'àdù òwu igi Bàlamà,  
 Bèorì\* t'ídhùnà núubhì ònǎ otu ǒ. Ndi Bàlamà  
 azè dhu ní ndòngyè malì nzére dhu ònzi ndi ndi  
 dhu-otù ǒ. 16 Ní Kàgàwà arù kà dǒ ndi kàbhà  
 nzérenga-okú dò rò: kàbhà kayinò, yà ìnzí aróte  
 ìzǎ nyú ròtè ìndrù bhěyi kà tò, rìsǒ wò kà rǎpàna  
 ndònzì ìnzá nga nòfò dhu.

17 Kǒkò i tìtò tó malímó rǐ'ì àdhàdhì yà ìmbǎ  
 idha arí'ì òyà idha-bhu bhěyi. Abádhí rǐ'ì  
 àdhàdhì yà àpùpù ròpilina àpbù bhěyi. Kàgàwà  
 óbhòlò wà ngari abádhí tò atdíǒ útì mbii ìnò ò.  
 18 Abádhí arí 'ìdzí 'àmbe ìmbǎ tǐya nà òte òvò  
 dǒ ìndrù tò orú tǐya nyú nà. Ndi dhu bhěyi ní  
 ndi, abádhí arí yà iwà ì nútù nzére dhu ònzi arí  
 ale rǒ rò ale nídha tǐya ò, ndíní ì nadù tí tdítdǒ  
 'àmbe yà ngbǒya rǐ atdyúya òho nzére dhu ònzi

\* 2:15 2.15 ǒzt 22.4-35

dõ. <sup>19</sup> Abádhí arí làká òkò ngǔkpà ale tò 'àti, i ale råròko dòyá ìtírò, tàmanyà pbání ì nyú ìtírò ní ìndrù àbhù arí rìnza ì dhu tó ìno rórò. Obhó tí, atdí dhu náapé ìndrù àgye, ní ndi ale ní wò ndi ndì nágyè dhu bhà ìno. <sup>20</sup> Obhó tí, atdídhená ale núbhà wà yà adzi ò nzére dhu t'ónzita, Yěsù Krístò ì úni fíyó Ádrùngbǎle tí ndirò Ògùba tí dhu-otù ò. Pbétù, abádhí apé 'àdù ì nzére dhu ò tdítđò, ì dhu ràdù 'àgyè, ní abádhí tó ófò ràdù ì ì nzére nyú ròsè angyi abádhí arí'ì nà ófò dònǎ. <sup>21</sup> Abádhí úni wà obhónánga tó otu, pbétù abádhí ádù yà fíyò ka kavò Kàgàwà bhà ìlǐlǎ Hyátá núbhà ìnzǐ 'ifu. Ní ndi dhu bhěyi kǐ'ina rò, dhu akána ìnzǐ abádhí rùni ndi obhónánga tó otu. <sup>22</sup> Wò ndi abádhí tó ófò náko wà ndi kǎkǎ mbàyi ò ka kòvò dhu nà kpangba. I mbàyi rátina: «Ìtsè nádu wà ndi, ndònyù yà ndi ndàdyo ònà rò dhu tdítđò\*.» Ndirò: «Iwà ndi nù'o mběyi àdù-íyà-ba nángbò wà ndi tdítđò, ndàmbe ndàhà dõ otđo ò.»

### 3

#### *Ìngo Ádrùngbǎle Yěsù níngoya dhu*

(Ìsa 51.6; 65.17; Mát 24.37-38; Luk 21.34-36; 1Tè 5.1-10; 2Tè 1.7-10; Yud 17-19; Upf 20.11; 21.1)

<sup>1</sup> Yà atdíđò ma mózè nyǐ rò ođhídù, yàrí ní oyo rí kisè bhàrùwà yà ma màndǐ fùkù. Kòkò oyo ma màndǐ fùkù bhàrùwà ò, ma mózè misè fùkù dhu ní iwà nyǐ nyúni dhu, ndínǐ nyǐ nabhù tí nyǐrè ì dhu tdítđò àkǎkǎ dhu bhěyi. <sup>2</sup> Ma mòzè

\* 2:22 2.22 Mbà 26.11



nyĩrè yà angyangyi ìlǐlǎ pbànábí núuno ote mà, Ádrùngbǎle, Ɔgùba Yèsù Krístò bhà Ɔyátá, yà kàbhà uvitatále núudhè fùkù màná. <sup>3</sup> Ròsè kóró dhu dóná, nyĩ nyáká nyùni dhu ní, kàrí idhò, yà yà adzi ǒ dhu-tsù rǐ ndàpà ndòdì ndì òyá ǒ rǐ'ì ale rǎrǐ afíya òzè dhu bhěyi tí ì nózè 'òkò ale. Abádhí nóowuna nyǔgbò rǒ, <sup>4</sup> 'àmbe àtìna dǒ: «Yèsù akò làkà ndàti, ìngo ndì rǎrǐ ìngo! Ní kòmbí kà rǐ'ì ngbòró? Obhó tí, ròpè ndì yà àlè t'ábhúna núuvèna rò\*, kóró dhu náarí'ì inè àdhàdhì yà Kàgàwà abhòlòna yà adzi rò ì í'ì dhu bhěyi tí!» <sup>5</sup> Wò dhu ùno ì í rò, abádhí ònǎ rò arana àdzo rǒ dhu ní: mùhàngú ò rò, Kàgàwà rabhòlò òrù-akpà mà yà adzi màná òtèna nǐ, ndirò kà rabhòlò yà adzi rǎhu idha ò rò, ndàdù adzi-kpa mà-ǒnga núndò idha màná. <sup>6</sup> Ndirò ndì ote-òbì nǐ tí, yà angyi í'ì adzi nínza ní òtòtù, rùpìlǐ ndì idha\*. <sup>7</sup> Ní, wò ndì ote-òbì nǐ tí, Kàgàwà úlì wà yà kòmbí rǐ'ì òrù-akpà mà adzi màná tsèna tí, ndíni ndì ndubìya tí kàzu ò. Kǎrí abádhí òdò wò ndì ìndrù-ànyǎ ndì ndunoya, ndàdù nzérenगतále-tse òtdì ònǎ idhò tò.

<sup>8</sup> Pbéttù, yà atdíidǒ ma mózè nyĩ rò òdhídù, atdí dhu rǐ'ì inè yà inzà àkǎ ndàdzo ùkunǎ rò. Ndi dhu ní: Ádrùngbǎle Kàgàwà-nyìkpó ǒ, atdí idhò rǐ'ì àdhàdhì atdí lufù ato bhěyi, ndirò atdí lufù ato rǐ'ì àdhàdhì atdí idhò bhěyi\*. <sup>9</sup> Ádrùngbǎle nàdzo nzá yà ndì ndakò pbìndà làkà nábhù ndì ndí rǎkǎ dhu rǒ rò, àdhàdhì yà atdíidhená ale

\* **3:4** 3.4 Ábhǒ ale rǐrèna dhu ní, «Àlè t'ábhúna» tí ka kátina iró ale rǎrǐ kǎkǎ wemberè tí Yèsù Krístò na'ú ale. \* **3:6** 3.6 Ɔpt

1.6-9; 7.11-23 \* **3:8** 3.8 Zàb 90.4

náarírèna dhu bhěyi. Obhó tí, kǎrí dzikù òndù, inzá ndì ndóze atdí ale mà ràwí, pbétù ndì ndóze kóró ale rùgèrè ì 'ùbhà fíyó nzérenga nídhuní.

<sup>10</sup> Ádrùngbǎle bhà idho níisíya àdhàdhì ogbotále rǐrà òná idho náarí isí inzá ka kùnì rórò dhu bhěyi. Ndi nínganí, òrù-akpà náawíya giritina rúva rórò. Ndirò, yà Kàgàwà abhòlò kóró dhu-tsí, yà inga àwù arí òrù-akpà-nyì-rò dhu-tsí, nídhoya ì kóró kàzù-fó. Yà adzi, òná arí'ì kóró dhu-tsí màná núuwíya kóró átò. <sup>11</sup> Nírò, wò dhu bhěyi kóró dhu nínzaya ì rò, nyí nyàkǎ nyòkò ìlǎ ófò ǒ Kàgàwà-nyìkpó ǒ, nyǎdù afíkù àpba kǒzè dhu ònzi nyí nyí dhu rǒ. <sup>12</sup> Nyí nyàkǎ nyòkò ndi dhu bhěyi yà Kàgàwà bhà idho òdò nyí nyí atdyúku nyé nà rǎkǎ tsàkàtsàkà òná kàsùmì ǒ. Ndi idho ǒ, Kàgàwà ubíya òrù-akpà kàzù nǐ, yà òrù-akpà-nyì rǒ arí inga àwù dhu ràdù 'ìdhò ndi kàzù bhà igbétá nǐ. <sup>13</sup> Àdhàdhì yà Kàgàwà akò làká-bvù rǒ, àlě kódonà dhu ní òrù-akpà-owútá mà, adzi-owútá màná rǔvò dhu. Ndi òrù-akpà-owútá mà adzi-owútá màná ǒ róko ale rǒngo ònzìnà dhu ní obhónánga tó dhu kèlě.

<sup>14</sup> Yà atdíidǒ ma mózè nyí rò odhídù, wò ndi idho òdò nyí nyí ònanǎ, nyí nyàkǎ nyòkò màrùngà ǒ Kàgàwà nà. Nyí nyàkǎ nyònzì obi nyòkò ìlǎ nyí nyílǎ kà-nyìkpó ǒ rórò, ndirò ìmbǎ nzére dhu tí ka kádù òzùnà atdí dhu mà rǐ'ì nyukùtsi rórò. <sup>15</sup> Nyí nyàkǎ nyùnì dhu ní, yà àlě tó Ádrùngbǎle rǎdi ìnzí ndàmbe ingo dǒ dhu rǎrǐ ndi otu nùbhà fùkú ndíní nyí nyugù tí. Ndi dhu rǐ'ì àdhàdhì yà àlě t'ádòná ndirò àlě t'ódhìnà Polò ándí fùkù yà Kàgàwà ábhù fíndà dhu-ònga

t'òvòta tó irèta-bvụ rǒ dhu bhěyi. <sup>16</sup> Kóró pbìndà bhàrụwà ùndí ndì ndí rò, kǎrǐ òte i dhu dǒ. Pbétù i bhàrụwà ò, ngǔkpà dhu rǐ ale-dò àlǔ dhu náarǐ'ì òbi tí. Ní kǎkà inzà nga núni, ndirò ìnzǐ 'àdù ò'ò afíya ònǎ rò ale, náarádù i dhu-tì ùle ávàya dò, àdhàdhì ì arǐ Ìlǐlǎ Andítá ò ngǔkpà dhu-tì ùlě dhu bhěyi. Wò dhu bhěyi ì i dhu ònzi rò, abádhí arǐ 'inzà ìtírò.

<sup>17</sup> Nírò nyǐ, yà atdíđǒ ma mózè nyǐ rò òdhídǔ, kònnǐ ma mòvò wà dhu angyangyi fǔkù. Ní nyǐ nyàkǎ nyǒdò nyǐ mběyi, akye nyǐ nyowuna kǒkò nzére ale tó nzérenga àbhụ rùwǐ nyǐ, ìnzǐ nyǎdù ìko pòtsó fùkú a'uta ǒ nǐ. <sup>18</sup> Pbétù nyǐ nyàkǎ nyǎmbe ò'ò dǒ ídzìnga ǒ, ndirò àlě tó Ádrùngbǎle, Ɔgùba Yěsù Krístò ùnǐ nyǐ nyǐ mběyi nyú dhu mànà dhu ǒ. Ìlèta àkǎ àlě ràbhụ kà tò ròpè ndì kòmbí, ndirò dhòdhódhonganà! Àmìnà.

## **Ungbòta-Ɔwátá Tó Bhǔkù**

### **Ndrǔna: Ungbòta-Ɔwátá Tó Bhǔkù New Testament**

copyright © 2015 Wycliffe Bible Translators, Inc.

Language: Ndrǔna (Ngit)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 22 Feb 2024 from source files dated 29 Jan 2022

abb6c630-aaf1-5647-8172-605215e8fe12